

Til ordførarane i
Alver,
Austrheim,
Masfjorden og
Modalen.

Kopi : Fader Dmitrij Ostinin, sokneprest i Kristi åpenbarings menighet i Bergen,
Eli Eidnes, kyrkjevevje i Masfjorden

**Sak: Førespurnad om tilsagn om økonomisk støtte til
julemarkering for ukrainske flyktningar i kommunane våre.**

Masfjorden sokneråd ved underteikna, arbeider i samarbeid med den ortodokse Kristi åpenbarings menighet i Bergen med planar om å lage til ei julemarkering for ukrainske flyktningar i vårt distrikt. I den ortodokse kyrkja vert jula feira etter «den gamle kalenderen», i januar, og tanken er å innby flyktningar i distriktet til å samlast på Fjon fjellkyrkje, og ha ei markering med ortodoks gudsteneste og felles måltid. Også medlemer av Kristi åpenbarings menighet vil verte inviterte til å kome.

Ei slik markering vil tene fleire føremål:

- Vi veit at jula er ei viktig høgtid, som gjerne vert høgtida i fellesskap med slekt, vener, naboar. Dermed vert ho også ei sterk og vond påminning om at krigen har sett ein stoppar for slike fellesskap. Ved å gi dei ukrainske flyktningane høve til å samlast til noko som i mangt og mykje minnar om ei tradisjonell ukrainsk julefeiring, vonar vi å kunne dempe noko av det saknet som heilt sikkert er svært sterkt.
- Ei slik samling på tvers av kommunegrenser – noko som etter det eg veit, ikkje har vore vanleg – er eit tiltak som kan bidra til å etablere eit større og meir allsidig nettverk for flyktningane.

Det er fleire grunnar til at vi har vald å leggje denne markeringa til Fjon fjellkyrkje. Ein grunn er at det er enkelt å kome til og frå, sidan kyrkja ligg like ved E39. Ein annan grunn er at kyrkja er vel tilrettelagt for ei markering som dette.

I skrivande stund er vi i ferd med å planleggje markeringa. Vi har fått fjellkyrkja reservert til laurdag 14. og søndag 15. januar 2023. Det vert kartlagt kor mange personar frå Bergen og Bjørnefjorden som ynskjer å delta, og det vert arbeidd med å lage eit innhald for opphaldet. Dette vil inkludere gudsteneste, felles måltid, høve til overnatting for dei som måtte ynskje det. Det kan også kome på tale å lage til ei ortodoks gudsteneste der folk frå lokalmiljøa også vert spesielt inviterte.

Men eit slikt prosjekt har ei kostnadsside, og må finansierast. Døme på utgiftspostar er

- leige av Fjon fjellkyrkje – kostnader for dette vil avhenge av kor mange som ynskjer å overnatte,
- transport av ukrainarar til fjellkyrkja
- kostnader til mat
- anna

I skrivande stund veit vi ikkje kva dette vil utgjere, og vi veit heller ikkje kor mange av dei tilspurde som ynskjer å vere med på å finansiere dette tiltaket. Difor veit vi heller ikkje om vi vil få tilstrekkeleg støtte til at prosjektet kan gjennomførast. Av den grunn er det vanskeleg å be om eit bestemt beløp.

I staden bed vi om ei tilsegn om støtte, på ein sum gjevar synest kan høve. Det vi då vil gjere, er å sjå om dei samla tilsegna gjev oss eit tilstrekkeleg godt grunnlag for å gjennomføre prosjektet. Ser vi at dette går bra, gjev vi attendemelding om dette, slik at løyvd sum kan verte overført til konto hos Masfjorden sokn.

Midlane vil verte bokført som postar i eit eige prosjekt i rekneskapssystemet til Masfjorden sokn. Kyrkjeverja i Masfjorden vil ta seg av tilvising og utbetaling, og det vil i ettertid verte laga eit eige rekneskap for prosjektet. Eit eventuelt overskot vil verte disponert inn mot liknande tiltak i framtida.

Ein vil ikkje gå ut til flyktningane med innbyding til ei slik markering før ein ser om opplegget let seg gjennomføre. Av den grunn er det ynskjeleg at ei eventuell tilsegn om støtte kjem så snart som praktisk mogleg, helst i god tid før månadsskiftet november/desember.

Spørsmål om prosjektet kan ein rette til leiar i Masfjorden sokneråd,

Rune Garmann,
Tlf. 915 24 405,
e-post: rune.garmann@gmail.com

Hosteland, den 11. november 2022

Rune Garmann
(sign.)